

Plaquette y reconocimiento pa Señora Aurora Thiel, un baluarte di Noord



ORANJESTAD (AAN): El a lanta su yiunan y den cierto forma el a yuda lanta hopi otro Arubiano tur rond di Aruba. Mientras cu Dios ta dun'e bida y salud e ta bay alegre su bida y esun di otronan tambe cu musica y baile, mescos cu el a haci for di tempo cu e tabata mucha.

Ta trata di Señora Aurora Guillermina Kelly Thiel di e barrio di Noord y e baluarte cu Gabinete Mike Eman ta reconoce e siman aki. Prome

Minister a haci entrega di un plaquette masha bunita cu su firma personal, durante un encuentro di famia y amigonan na su residencia na Noord 48.

Awendia cu su 72 año, e señora viuda di defunto Egidio Thiel, cu kende el a haya su tres yiunan Truus, Swinda y Franklin, ta sigui hopi activo como un miembro di varios organizacion cultural manera Flor Bini Bini y Coro Santa Ana, entre otro. E ultimo aki,

el a join despues di a ricibi, tempo cu e ainda nan tabata dirigi pa Soeur Magdalena, entre otro.

Un di e logronan di mas importante den su bida, tabata di por a cumpli cu e vocacion di siña mucha. Señora Aurora ta conta con na 1974, ora cu su yiu di mas chikito a bay kleuter y encurasha pa e deseo cu semper e tabatin di ta un juffrouw di school, el a cuminsa wak pa mucha na su cas. Rapidamente un boca a



bisa otro di su bon cuido y el a dicidi di habri un speelschool, e prome den districto di Noord. El a yama e school 'Suske & Wiske' mescos cu e bukinan cu tanto e tabata gusta lesa. Durante 22 año el a keda opera e school y na 1996, ora cu finalmente el a retira, e tabatin cinco lider y un total di 75 mucha. "Mi tabatin mucha ta bin for di San Nicolas cu nan mayornan ta traha na hotel," Señora Aurora a splica bisando tambe cu hopi di e muchanan cu el a wak pa nan awendia ta abogado, dokter y otro profesional loke ta yen'e di satisfaccion. No tin duda cu Señora Aurora su hobby ta canta y baila. E ta un miembro di Grupo Flor Bini Bini ya pa 10 año y Grupo Magdalena na Ayo como tambe di e gruponan di baile di San Juan na Ayo y

Noord. Den e gruponan aki e ta yuda den organizacion di hersengymnastiek, domino, 'Mens Erger je Niet', canta y baila pa esnan cu ta haci año, organiza evento manera comemento pa dia di mama, dia di tata, himno y bandera tur pa nos grandinan. For di man di Prome Minister Mike Eman y cu hopi emocion visibel riba su cara, Señora Aurora a ricibi su plaquette hunto cu elogionan di tur loke el a yega di haci pa e districto di Noord y pa henter e isla. Tur esnan presente a bati man y mescos cu den ocasionnan anterior, Premier Eman ta expresa e satisfaccion grandi cu e ta sinti di por duna reconocimiento na Arubianonan valioso manera Señora Aurora den cada barrio cu e ta bishita.